

## 唐·李益 七言绝句 24 首

### 夜上受降城闻笛

回乐烽前沙似雪，受降城外月如霜。  
不知何处吹芦管，一夜征人尽望乡。

### 从军北征

天山雪后海风寒，横笛遍吹行路难。  
碛里征人三十万，一时回首月中看。

### 汴河曲

汴水东流无限春，隋家宫阙已成尘。  
行人莫上长堤望，风起杨花愁杀人。

### 隋宫燕

燕语如伤旧国春，宫花旋落已成尘。  
自从一闭风光后，几度飞来不见人。

### 写情

水纹珍簟思悠悠，千里佳期一夕休。  
从此无心爱良夜，任他明月下西楼。

### 春夜闻笛

寒山吹笛唤春归，迁客相看泪满衣。  
洞庭一夜无穷雁，不待天明尽北飞。

### 塞下曲（其一）

蕃州部落能结束，朝暮驰猎黄河曲。  
燕歌未断塞鸿飞，牧马群嘶边草绿。

### 塞下曲

伏波惟愿裹尸还，定远何须生入关。  
莫遣只轮归海窟，仍留一箭定天山。

### 边思

腰垂锦带佩吴钩，走马曾防玉塞秋。  
莫笑关西将家子，只将诗思入凉州。

### 度破讷沙（其二）

破讷沙头雁正飞，鸛鹑泉上战初归。  
平明日出东南地，满碛寒光生铁衣。

### 征人歌

胡风冻合鸛鹑泉，牧马千群逐暖川。  
塞外征行无尽日，年年移帐雪中天。

### 听晓角

边霜昨夜堕关榆，吹角当城汉月孤。  
无限塞鸿飞不度，秋风卷入小单于。

### 夜上西城听凉州曲（其一）

行人夜上西城宿，听唱凉州双管逐。  
此时秋月满关山，何处关山无此曲？

### 夜上西城听凉州曲（其二）

鸿雁新从北地来，闻声一半却飞回。  
金河戍客肠应断，更在秋风百尺台。

### 临滹沱见蕃使列名

漠南春色到滹沱，碧柳青青塞马多。  
万里关山今不闭，汉家频许郅支和。

### 夜宴观石将军舞

微月东南上戍楼，琵琶起舞锦缠头。  
更闻横笛关山远，白草胡沙西塞秋。

### 上汝州郡楼

黄昏鼓角似边州，三十年前上此楼。  
今日山城对垂泪，伤心不独为悲秋。

### 行舟

柳花飞入正行舟，卧引菱花信碧流。  
闻道风光满扬子，天晴共上望乡楼。

### 宫怨

露湿晴花春殿香，月明歌吹在昭阳。  
似将海水添宫漏，共滴长门一夜长。

### 古瑟怨

破瑟悲秋已减弦，湘灵沉怨不知年。  
感君拂拭遗音在，更奏新声明月天。

### 诣红楼院寻广宣不遇留题

柿叶翻红霜景秋，碧天如水倚红楼。  
隔窗爱竹无人问，遣向邻房觅户钩。

### 柳杨送客

青枫江畔白蘋洲，楚客伤离不待秋。  
君见隋朝更何事，柳杨南渡水悠悠。

### 送人归岳阳

烟草连天枫树齐，岳阳归路子规啼。  
春江万里巴陵戍，落日看沉碧水西。

### 送客还幽州

惆怅秦城送独归，蓟门云树远依依。  
秋来莫射南飞雁，从遣乘春更北飞。